

Usaha pulih hutan ambil masa

Hutan simpan diceroboh perlu tempoh lama untuk kembali keadaan asal

BESTARI JAYA - Usaha untuk memulihkan semula hutan simpan terutamanya Hutan Simpan Raja Musa yang sebelum ini diceroboh untuk tujuan pertanian memerlukan tempoh yang lama.

Pembantu Exco Pelancongan, Hal Ehwal Pengguna dan Alam Sekitar, Lee Kim Sin berkata, hutan seluas 1,000 hektar daripada 23,000 hektar yang terjejas itu memakan masa hampir lima hingga 10 tahun meskipun Kerajaan Negeri sudah mengambil alih tanah yang diceroboh sejak 2008 lalu.

Menurutnya, sudah menjadi polisi Kerajaan Negeri untuk memastikan kawasan hutan simpan yang diterokai sebelum ini dipulihkan semula secara berperingkat dan setakat ini, tiada kebakaran terbuka akibat aktiviti pertanian dan komersial dilaporkan.

"Hutan simpan yang ada di daerah ini perlu dijaga kerana Kuala Selangor memiliki

anugerah alam yang tidak ada di negeri lain.

"Keunikan tanah lembap yang terdapat pada hutan paya gambut berbeza berbanding hutan lain dan boleh menjadi tumpuan kajian penyelidikan dalam dan luar negara," katanya ketika rasminya sambutan Hari Tanah Lembap Sedunia 2012 di Hutan Simpan Raja Musa.

Hadir sama, Pengarah Jabatan Perhutanan Selangor, Yusoff Muda, Pengarah Global Environment Centre (GEC), Faizal Parish, Yang Dipertua Majlis Daerah Kuala Selangor (MDKS), Noraini Roslan dan Pengurus Korporat HSBC Bank Malaysia Berhad, Koo Yi Lin.

Difahamkan, sebanyak RM20 juta diperuntukan untuk sektor pelancongan di negeri ini dan di Kuala Selangor sahaja, Kerajaan Negeri memperuntukkan RM1 juta untuk tujuan sama.

Faizal ketika ditemui ber-



Kim Sin (kiri) menanam pokok bersama Faizal (dua, kiri) dan Noraini sebagai simbolik perasmian Hari Tanah Lembap Sedunia 2012 di Hutan Simpan Raja Musa.

kata, program pemuliharaan Hutan Simpan Raja Musa adalah program kerjasama antara Jabatan Perhutanan Selangor bersama GEC sejak 2008 lalu bagi memulihara lebih 1,000 hektar hutan yang diterokai sebelum ini.

Program berkenaan kata-

nya, melibatkan pelbagai tindakan lain termasuk mengawal kebakaran, pemuliharaan paras air semula jadi bagi menggalakkan pertumbuhan semula dan kerja penanaman 1,000 anak pokok tenggek bu-rung melibatkan 250 sukarelawan, pelajar dan penduduk.

"GEC berjaya mengumpul lebih 4,000 sukarelawan melalui aktiviti penanaman pokok dan menanam 40,000 anak pokok di kawasan seluas 80 hektar sejak 2008 lalu, kita turut mendapat sokongan HSBC, International Funds for

Agricultural Development (IFAD), Global Environment Facility (GEF) dan European Union," katanya.

Dalam program sama, Sahabat Hutan Gambut (SHG) dilancarkan bagi menyokong penglibatan masyarakat setempat dalam Program Pemuliharaan Hutan Simpan Raja Musa dan mengadakan perkongsian tanggungjawab agensi kerajaan dan badan bukan kerajaan (NGO) dalam menguruskan ekosistem hutan paya gambut.

Program Renjer Hutan Tanah Gambut turut dilancarkan sebagai program pendidikan alam sekitar yang dimulakan GEC untuk memupuk kesedaran kepada pelajar sekolah yang terlibat iaitu Sekolah Menengah Kebangsaan (SMK) Raja Muda Musa, SMK Rantau Panjang, SMK Sultan Sulaiman Shah dan SM Teknik Kuala Selangor.